

M350: Kölner Urkunden

- 1,1 IN Godes namen amen . Wir Wicbolt der ertzebischof van kolne duon
kuont allen den gienen die diesen breif seint inde huorent . Vp dat tuschen
/
1,2 vns . Inde vnsen lieuen .. Buorgere- van kolne vruontlige verbuntnisse
gantzer hiemeligeit . inde restliges vrieden vroligeit achter males bliuen /
1,3 vnverbruchlig ane argelist . So orkunde wir dat mit diesen brieven dat wir
gelouet hauen inde gelouen mit guoden truwen . alle recht vrijheide
1,4 die in .. keysere .. kuoninge . inde .. Ertzebischoffe van kolne geduldiget
haint inde gegeuen . Inde oich iere guode gewuonede die sij van alders here
1,5 bracht haint . inde die sij nu haint binnen kolne inde da in bussen
vnverbruchlig ze haldene / inde steidegen in dei inde confirmeren . Ouch
bikenne /
1,6 wir inde iergeyn mit diesen seluen brieven dat de selue .. Buorgere van kolne
sunderlige inde sementlige mit ierme guode . inde ierme live /
1,7 varende inde kuomende zuo wassere inde zuo lande in vnseme lande inde in
vnser macht . vrij . los inde quit sint inde suolen sin / inde oich sij halden
van
1,8 allen Tollen inde pedagien sunder argelist . Des zuo eyne gehuchnisse inde
zuo eyne kenligeme vorkunde so hayn wir vnse Ingesigel an disen breif
1,9 gehangen . Inde wir .. Capittel van me duome / inde andere .. Capittelle
inde .. Godeshus so kanuonige inde .. Muonege binnen kolne iergein des
dat
1,10 wir vnse Ingesigele an deisen breif hain gehangen zuo eyne meirreme
vorkunde dieser dinge . Dit is gescheit inde gegeben na Godes gebuoyrde .
1,11 Dusent . Drun hundert . inde zwei iar des neisten dages Sente Seuerines
dage . In me Legere kuoninges Albrechtes bi kolne .
- 2,1 IN Godes namen ameN . Wir Wicbolt der ertzebischof van kolne duon
kuont allen den Gienen dei diesen breif seynt inde huorent .
2,2 vp dat tuschen vns . Inde vnsen heren Buorgeren van kolne vruontlige
verbuntnisse gantzer hiemeligeit inde restliges vrieden
2,3 vroligeit achter males bliuen vnverbruchlig ane argelist . So vorkunde wir
dat mit diesen brieven dat wir gelouet hauen
2,4 inde gelouen mit guoden truwen alle Recht vrijheide die in keysere ..
kuoninge inde . Ertzebischoffe van kolne geduldiget hant
2,5 inde gegeuen Inde oich iere guode gewuonede dei sij van alders here bracht
hant inde dei sij nvo haint binnen kolne inde da in bussen vnverbruchlig

- 2,6 ze haldene inde steidegen in dei . inde confirmeren Oich bikenne wir inde iergeyn mit diesen seluen brieven dat dei selue ..
- 2,7 Buorgere van kolne sunderlige inde sementlige mit irme guode inde mit ierne live varnde inde kuomende zuo wassere inde zuo lande .
- 2,8 in vnseme lande inde in vnser macht vrij los inde quit sint inde suolen sin inde oich sij halden van allen Tollen inde pedagien sunder argelist
- 2,9 Des zuo eyne gehuchnisse inde zuo eyne kenligeme vrkunde so han wir vnse Ingesigel an diesen breif gehangen . Inde wir .. Capittel van
- 2,10 me Duome inde andere Capittelle inde Godeshus so kanuoge inde muonege binnen kolne iergen des dat wir vnse Ingesigele an desen /
- 2,11 breif han gehangen zu eyne meirreme vorkunde dieser dinge Dit is gescheit inde gegeben na Godes gebuoyrde Druozeyn huondert
- 2,12 Iar in deme anderme Iare dar na des neisten dages Sente Seuerines dage .
- 3,1 Wir Wicbolt van Godes genaden Eirtzbischof des heligen Stichtes zuo kolne . inde Ertzekanzeler des heiligen Roimschen Riches en Italien vorhein offenbare vnde kuonden allen Luden di disen brif seynt vnde horent .
- 3,2 dat wir mit vnseme heirren den hogen Romischen kuoninge Albrecht vmbe des Riches guot vmbe zolle vnde vmbe alle ander sache kreig vnd misshelunge di tuschen im vnd vns sint gewesin bis her vp desen dag sin verrichtet
- 3,3 vnd versuonet / wililig . leiflig guotlich vnd genczlich . als he naig geschreben stat . Des eirsten dat wir dem seluen vnserme heirren kuoning Albrecht weider geven sowat waz ertvert dat wir des Riches guodes bis her bekumbert vnde behalden
- 3,4 hain . vnde suolen ave duon den zol vnd dat geleide zuo andernach . also dat der kuoninc drij Man neme van den vuonfen de her na geschreuen staint . van den .. Greuen van Cleuen van Guliche . van der Marken van katze-nelinbogen vnde van dem
- 3,5 herren van kuoc . dat die vp iren eyt ervaren suolen an den Steden van Basel den Rin af biz zuo Nussen . vmbe erbere lude si sin geistlich oue werentlich . vnd sowat sy ervarent dat wir aldes riches an deme zolle vnd an deme geleide zuo ..
- 3,6 Andernach haven dat suole wir an halten sin / dat ander sal ave sin . Vnd were des Got neit en wille dat der drier einer ave ginge so sal der kuoninc van den andere zwein eynen an sine stat nemen wielgen hei wilt . Oich suole wir die Buorg zuo ..
- 3,7 Ruolansekke brechen . vnd sal der kuoninc vnd wir vnd dei Heirren van me Lande di .. Priore vnde de Stede dei man dar zuo welen sal gelouen dat man vuorbaz da engeyne buorg laize gebuowen . Wir suolen oig den zol vnde dat geleide zuo Buonne ab duon .
- 3,8 Doch suole wir behalden den zol zuo Nussen . na sime alden rechte . vnde have wir dar vp iht meir gesat dat suole wir ave laizen . Dar vouer wat Stede oue buorge gebrochen ist in diesen vorluoge van des kuoninges helperen de sal man neit

- 3,9 wieder buowen an sinen willen . Wir suolen oich fuorbaz den zol vnde dat geleide zuo Berke aue legen / dar zuo suole wir wider geven alle breif vnde haintveste van den vuor genanten zollen de vns sint wuorden van kuoninc Adolf . vnde nv van vnserme
- 3,10 heirren kuoninc Albrechte . vnd suolen des sicherheit duon of wir engeinen breif ove haintfeste dar vouer biheilden dat dei her na ingeyne macht haben . Vuorbaz loue wir getrulich dat wir deme seluen vnserme herren kuoninc Albrechte gen in ewelige
- 3,11 helpen vnde zuo vordirst wider den Greuen van henegowe . vnde neit wieder vnsen herren vnd geistligen vader den Paws . Wir suolen oich des .. kuoninges .. Helperen an allen stucken minne oue recht duon / da si it an vns vurderent / vnd suolen sij
- 3,12 vns dat selve her wieder duon . mit suolicher bescheidenheit dat wir suolen kiesen zwein Ersame Man / vnd sij ouch zweine de suolen dar vouer spreken vp ieren eyt den sij dar vouer sweren suolen vnde ende geven tuschen hei vnde winachten de nv
- 3,13 neist kuomet . vnd sowat de veir vouereyn kuoment mit minnen ove mit rechte vnde sprechent dat sal man beidenthaluen steide hain . vnde vp richten Jnwendich eynen Mainet . dar na so si gesprochen haint / Wer auer dat dei selue veire vouereyn
- 3,14 neit kuomen in mochten sowat si dann er gesprochen hant dat suolen si beidenthalven mit geschrift deme kuoninge antwerden vp ieren eyt / vnd sowat danne der kuoninc dar vouer spricht dat suole wir beidenthaluen steide hain vnd vp richten
- 3,15 Jnwe-dig eynen manot dar na . Dede wir des neit so suole wir mit vnses selves live mit vuonfzig pereden ze Dusebuorg in varen vnd danne neit kuomen biz dat wir vp richten vnd duon sowat di vier Scheideman vouereyn kuomen sin .
- 3,16 oue sowat der kuoninc dar vouer gesprochen hait vnd dat man des van vns sicher si so geve wir vnde setzen deme selven .. kuoninge veirzich Man guder lude Riddere vnde knechte ze burgen dei suolen dat gelouen mit guoden /
- 3,17 truwen oue wir brechen dat si in varen zuo Duseburg vnde dannen neit kuomen biz et vp gerichtet werde als it da vuor geschreuen stat . Wer oich dat it bleue an vnsen scheideluden dat si dar zuo neit kuomen / oue spreken wolden
- 3,18 so suolen wir vnde vnse .. Buorgen inwendich eynen Manet / wanne wir gemanet werden ze Dvseburg in varen vnde leisten biz dat van den Scheideluden gesprochen vnd van vns vp gericht werde . Dar zuo suole wir alle dei .
- 3,19 Lehen dei vns in deiseme vrluoge van vnsen deineren vnd Leneren vp gegeuen sint . weder lenen also dat eweliger an sime rechte vnde an sime erve sal bliven . dat sal man oich vns her wieder duon . Vorbaz der .. Bischof van
- 3,20 Ludiche / vnd der .. Greue van Cleue suolen ervaren vp ieren eit vmbe de burcgraschaf ze kolne Ist dat si lediklich zuo dem Riche hort so sal sij der kuoninc behalden . Jst euer dat si an gestichte hort so suolen wir si behalden

- 3,21 Wir suolen oich meister Conrat van lorch in de gewere der proifstie ze werde wieder setzen / als wir in dar vs genomen hain . Vorbaz vmbe dei profstie ze kerpene wer dei ze rechte han sal / sal der kuoninc eynen oue zweine
- 3,22 paffen kiesen / inde wir oich eynen oue zweine Swat dei dar vouer sprechent mit dem rechte dat suole wir steide halden . Noch me dei .. Buorgere van kolne sin also vrij Buorgere quit mit alle irme guode vnde mit irme
- 3,23 Live van allen zollen vnde allen pedagien dei vnse sint vp wassere vnde vp der erden in alleme vnseme lande / vnd suolen wir den seluen .. Buorg'en van kolne bestedegen mit vnsem offenen breiven vrijheit / vnd recht de sij hant gehat
- 3,24 van .. keyseren vnd van .. kuonigen . vnd van .. Erzebischoffen van kolne vzzen vnd i-nen der stat van kolne vnde ier ailde guode gewonede de sij biz her haint gehat . Et sal oich van der Buorg vnde van der stat zuo
- 3,25 dem Bruoyle . der stat vnd den .. Buorgeren van kolne her na in geyner zit engeynen schaden geschein . also dat dei selbe veste zuo dem Bruoyle / Burg inde stat / oue ir hindersazzen van der stat van kolne neit geletzet
- 3,26 oue besweret werde . des suolen wir in beidenthaluen breife an eynder geven / Vnd dat wir dei vuor genanten Zolle dei wir aue geleicht haben neit weder setzen suolen an vnser heirren des vor genanten Roimschen /
- 3,27 kuoniges Albrechtes . vnd siner Nakuomen .. kuonige oue keysere gunst . vnd guoden willen so antwerde wir ze sicherheit . vnd ze pande vnse Burge vnd veste . Aspele . Berke . Lydeberg . vnd Nuwenb'g . dem ersame-
- 3,28 manne Ludolfen van der dieke vnser stisches Duomheren zuo kolne ieme zuo hauen van des Roimschen kuoniges wegen biz winachten dei nv neiste kuomet vnd van dannen vuonf Jar . Vnd sal der selue Ludolf deme seluen
- 3,29 Roimschen kuonige sicherheit duon mit sinen truwen / mit eyden vnd mit brieven / oue wir der vuor genanten zolle dei wir ab gelazen hain engeynen weder setzen oue engein guot da van nemen / vnd dat neit weder deden inwendig
- 3,30 eynen Manet sowanne wir gemanet werden / dat he dei selue Burge vnd vestene dem vuor genante Roimschen kuonige antwerden also lange i-ne ze haldene vnd ze besetzen biz dat wir weder duon vnd vp richten beide an
- 3,31 zollen vnd sowat wir da van genomen hain . wieder dei vuor geschriuen setze . vnd sowanne wir dat geduon so sal man dem vor genanten Ludolf dei selue veir vesten weder antworten ze haldene van des seluen Roimschen ..
- 3,32 kuoniges wegen in pandes wisen als ei . Wer ouer dat der selue Ludolf van der Dieke abe ginge so sal man de selue veir Burge antwerden eyne anderme getruwen Manne da deme .. kuonige ane genuoget in alle der
- 3,33 wise ze halden als si dem vor genanten Ludolf'e worden gantwuort . Vouer dat suolen wir heitzen gelouen Swantzich heirren / vnd Hundert Ridder vnd knechte guoder Lude an geverde oue wir dei seluen zolle weder
- 3,34 ane vingen / vnde nemen an vnser heirren willen des vuor genanten Roimschen kuoniges Albrechtes / dat si vns danne neit weder den seluen Roimschen kuoninc beholfen sin mit gunst mit reden oue mit werken . Vnd suolen

- 3,35 de selue zwenzich heirren vnd hundert Riddere vnd knechte in den selben
geluobde biz winachten de nv neist komet vnd van danne vuonf ganze iar .
Dan noch suolen de .. Buorgere van Bvnnen . vnd van Berke dem selben
3,36 Roimschen kuoninge gelouen / vnd ir offennen breiue dar vouer geven dat
si neit gestaden dat wir de aue gelazenne zolle zuo Bvnne vnd ze Berke her
na in geiner zit weder nemen oue setzen an des vor gesprochen /
3,37 vnses heirren kuoninges Albrechtes gunst vnd guoden willen . Oich suolen
vnse .. Buorg'e van Nussen iem gelouen . vnd dar vouer iren offenen breif
geven dat si neit gestaden dat wir iet meir nemen wan den alden rechten
3,38 zol ze Nussen . Also suolen oich dei Buorger van andernach louen vnd
des iren offenen breif geven dat si neit gestaden noch lazen vns geynen
anderen zol ze andernach nemen / wan als dei drij Heirren sprechent an
dei es gelazen
3,39 ist . Alsus is eyne Suone gemacht vnder dem vor gesprochen dem
Romschen kuoninge Albrechte / den Greuen van Cleue van Guliche van
den Berge van der Marken / van den heirren van valkenburg vnd van kuoyc
3,40 vnder den Buorgeren van kolne . vnd van Bvnne vnde dem .. Burgrauen
van Rinecken vnd iren Helperen an eyne teil . vnd vns vnd vnsen Helperen
an dem anderme teil / van doden van gefangen / van royve
3,41 van braynde vnde van anderen schaden sowe sij gescheit sint paffen Leyen
oue Juoden / also dat her na dar ave engeyn vrage oue klage si ove werde .
Oich suolen de gefangenen beidenthalben ledig sin / vnde sal alle
3,42 beschatzunge aue sin dei neit gegeben ist . Oich suolen sij ze vr recht
sweren . Jst oich ingeiner des vuor genanten vnses heirren des Romeschen
kuoninges Albrechtes Helfer in desen dingen in vnsen Ban kuomen den
suolen wir
3,43 dar vz lazen . Dar vouer suolen de drij heirren van den vuonfen eirvaren
vnd erkennen oue wir engeynen anderen vnrechten zol oue vnrecht geleide
hauen vp wazzer oue vp lande / sowa sij dat ervarent dat
3,44 suolen wir ave duon . vnd suolen wir vnde vnse Helpere / vnd des kuoniges
Helpere weder ie der man an sin guot vnd an sin recht kuomen . als vuor
den vorluoge sunder der zolle vnd geleide vnd ander guot als
3,45 an desen breif ist vz genomen . Dise Suone vnde ebenug loue wir mit guden
truwen an alle geverde ze behalden als setzen vnd stucken vestinlich vnd
vnverkeret ze behalden als hie vuor schreven ist / vnde geven
3,46 dar vouer zuo eyne offen vorkuonde vnd ze eyner gantzer stedigeit desen
breif besigelt mit vnseme / vnd mit der Ersamer Heyrren heren Gerardes
des ertzebischoffes van Megentze . vnd der Bischof
3,47 h'en Adolfs van Ludiche . Heren Eniches van Frisingen . vnd herin Sifrides
van Chvr Ingesigel biesigelt . Wir van godes genaden Gerhart Ertzebischof
ze Megentz . Aduolf ze Ludich . Eniche ze Frisingen
3,48 vnd Sifrid ze Chvr de vor genanten Bischof vorgein vnd bikennen dat wir bi
der vor genanter Suonen sin gewesen vnd dat diese selue Suone also geredet
gemachet vnd gelouet ist als si dar voben geschreiuen
3,49 stat / Vnd dat wir durch bede des ersamen heirren Wicholdes erzebischoffes
van kolne vnser Ingesigel vp bezzer kuntschaf vnd sicherheit an desen breif
gehangen hain . Dit is gescheit vnd

- 3,50 des breife gegeben vp den velde bi kolne des neisten dages na Sant Seuerines
dage . do man zalte van kristes gebvort . Drizehen hundert Jar in deme
anderme Jare dar na
- 4,1 IN Godes namen amen . Dat si kunt allen den dei diesen breif ane geseynt
. Dat Wir Friederich van Rifferscheit heirre van Maelberg mit
4,2 den Ersamen Luden den .. Richteren den .. Scheffenen inde den .
Buorgeren van kolne / mit rade vnser Maige inde vruonde ouerdragen
4,3 hayn alsus Dat wir Friederich inde vnse Eruen dei na der ziit te Maelberge
heirren sint te kolne Buorgere worden sin inde wesen suolen
4,4 erfliche / So dat wir inde dei selue vnse Eruen dei Buorg'e van kolne
semenclige inde sunderliche in vnseme Lande inde vnser heirschaffe
4,5 inde in vnseme gerichte inde oich enbuszen vnseme Lande mit guoden
triwen bischirmen bivrieden inde bihuoden suolen an liue inde an guode
gelicher
4,6 wis also vnse selues lude sunder argelist Dat si oich te wissene dat wir inde
vnse Lude in kolne bischirmit suolen sin inde vrideliche geliche den ..
4,7 Buorgeren van kolne / vort si dat te wissene dat wir dei stat inde dei
Buorgere van kolne na vnser maicht halden inde huoden suolen in alle deme
4,8 Rechte inde in der vriheide inde in den guoden gewonden da si van alders
mit hayntvestingen in geschrichte her hant bracht inde da si nu inne
4,9 sint inde sitzint were oich dat dei .. Buorgere van kolne da ane ieman
drucken oue drengen wuolde in eynicher wisen mit gewelden inde z
uonrechte
4,10 weider den suolen wir der Steide inde den Buorgeren van kolne raden inde
helpen gelicher wis also eyn getruwe Buorg'e siner steide schuldich
4,11 is ze duone So dat wir in neit weidersagen en mugen inde sij engeyne wis
begeuen en suolen / vort en suolen wir dei Burgere van kolne beide
4,12 in vnseme Lande inde anderswai neit bisweiren Lazen na vnser macht ce
vnrechte were euer dat eynich Burg'e van kolne in vnseme gerichte
4,13 iema-ne ove van iemane biklagit wuorde vmbe schuolt ove vmbe eyniche
andere Sache so sulen wir den Burg'e van kolne guoyt inde genedich
gerichte
4,14 duon duon sunder vair Dat selue sal oich vnse Luden binnen kolne
gescheyn Js oich dat eynich vnser Lude binnen kolne oue eynich Buorg'e
4,15 van kolne bi-nen vnseme gerichte eyniche schuolt machede ove . des Got
neit in wille eyniche missedinc deide dar vmbe en suolen wir en in eyne side
/
4,16 noch dei Burgere in ander side nemanders vnschuldiger lazen besweren noig
penden mer eyn iewelich kleger sal ieme mit rechte Laiszen
4,17 genuogen / Quem it oich also dat dei Buorgere van kolne vons helpen
ane gesuonnen so suolen wir in ce helpin selue hendelingen binne- kolne
kuomen
4,18 mit zwein .. Ridderen inde Eychte knappen mit den wapenen vop
ouerdeckedin Orsin inde helpin in inde der Stede van kolne na vnse Eren
4,19 vp iere kost also dat si vons suolen geuen ce Mainde Seis marc kolschir
pe-ninge genge inde geive inde vuor iewelichen vnse Riddere also

- 4,20 veile inde vuor eynen iewelichen vnsen knappen drij marc ce Maynde Oich
 si dat ce wissende sowanne dei Burgere inde dei Stat van kolne /
- 4,21 vnser helpen haint ce duone enBuosen Kolne so suolen wir in helpen mit
 aller vnser maicht inde na vnsen eiren vp vnse kost sunder aller hande
- 4,22 argelist vort so suolen dei Buorgere van kolne vp vnsen husen inde in allen
 vnsen vesteni-gen nit halden sin . inde vp inde af riden vrijlichen
- 4,23 ce allen ieren vrbuoren Quem it oig also des Got neit in wille dat eyniche
 zweiu-ge ove zwist tuoschen vons inde vnsen Luden in eyne side inde
- 4,24 den Buorgeren van kolne vp ander side vp leife dar zuo suole wir drij vnser
 Manne inde Sij drij ierre Burgere schicken dei des
- 4,25 maich hauent dat neider zuo legene binnen veirzich dagen mit guoden
 truwen vp ieren eyt . Jnde vmbe duose vuorworde inde deise
- 4,26 vruontschaf truoweliche ce haldene inde ce duone so hait vons dei stat van
 kolne gegeben vunftzeyn marc geldis binnen kolne vp sente
- 4,27 Mertines dage iarliges ce geldene an redelicheme erue alle vnse vorbuore da
 meide ce duone vsbischeiden dat wir inde vnse Eruen
- 4,28 dat Erue neit verleinen noch verkoyfen en muogen noch en suolen it en
 bliue an vons inde an vnsen Eruen dei heirren ce Maelberg weisen
- 4,29 suolen erfliche Jnde hayn wir vuor genande Friederich der heirre van
 Maelberg mit gegeuener truwen gesichert inde gesworen
- 4,30 c en heiligen alle deise vuorworde ce duone inde ce haldene truwelichen ane
 aller hande argelist . Jnde willen oig dat eyn iewelich vnser
- 4,31 Eruen dei heirre ce Maelberg is deise selue vuorworde ernuwe inde steide
 halde truweliche an argelist . Jnde wir Richtere ...
- 4,32 Scheffenen der .. rait inde de .. Buorgere van kolne ergeyn mit deisen breive
 dat alle deise vuorworde wair sint inde hayn vnse
- 4,33 Burgere Meistere mit gegeuener truwen inde ane argelist vuor vons allen
 duon gelouen deise vuorreworde steide ce haldene Jnde
- 4,34 vp dat deise dinc vaste sin inde steide bliuen so hayn wir der vuor genande
 Friederich an eyn side . inde wir dei stat van Kolne vp
- 4,35 ander side vnse Jngesiegele an deisen breif gehangin . Dit is gescheit na
 Godes gebuorde / Dusent iar Drun huondert iar inde veir
- 4,36 iar des neisten dages sente Lucien dage in deme Maynde den man heist
 December Jnde heit vnser iewelich part deiser breive eynen
- 4,37 bisiegelet mit vnser beider Jngesiegele
- 5,1 IN Godes namen amen . Wir Roprecht van vyrnenburg . Symon van
 Sphaynheim . Heynrich van Solmeze gehezen van Sphaynheim . Greuen
 . Raitluode inde Suonlude . ze rehte of ze minnen . van deme Ersame inde
 geistliche vnse vadere inde heire . herin Heynriche deime
- 5,2 Ertzebischoue van kolne van eynre Siden . Inde wir Euerhart van der
 Marken / Iohan van Sphaynheim Greuen . inde Johan heire van kuoyc
 . van deme Edele manne . herin Gerharde deime Greue van Guoleghe vp
 ander Siden gehoren vp de Swiege . Inde dei
- 5,3 puonte dei sich tuschen den vuorsprochen partien erlofen hadden . inde dar
 vp wir alse her na geschreuen steit gesprochen hain duon kunt al den geinen
 dei disen breif aine seynt inde horent Dat wir aine geseyn inde gepruoft
 hayn na deime dat dei stuocken dar

- 5,4 dei zwienge vmbe wesen mochte Sagen tuschen deime Ertzebischoe inde deime Greuen vmbe gemeyne noyt beste inde vreide vore gemeynes Landes vp beiden Siden eyndrechlige inde Sementliche einre Minnen ouerdragin sin . also her na geschreuen steit Inde
- 5,5 ze alreerst So sprechgen wir van der Buorg ze Rymezheym dar vnser heire der Ertzebischof den Greue vmbe ayn sprach / inde sich vermas dat hei dei Buorg also eyn Eygen des Gestifs van kolne weder herin Reymere van Rymezheym ane wille des
- 5,6 Gestiftes gegolden hedde wir vmbe eyne stede vruontschaf tuschen deime Ertzebischoe inde deime Greuen vouerdragen sin dat eyne des vuorsprochgene Greuen Dochter van Guleghe neme- sal herin Roprechtes des Jungen van virnenburg Suon dei is Encklin
- 5,7 vnser Roprechts des greuen van virnenburg eynes der Suoneman dei vuor gesprochgen is . dei Suon is Roprechtes vnser eirstes Sones inde dei besitzen sal dei Graschaf inde heirschaf van virnenburg inde dat dar zo gehoert inde her namaelz gewinne- mach inde dat vnser
- 5,8 heire der Ertzebischof dei vuorsprochgen buorg inde sowat dar zuo gehoert inde of nu van Nuwes dar zuo gekocht is lenen sal den vuorsprochgen kinderen Jnde sowat der Greue dar zuo gekoft inde gebuwit hait dat sal hei och den kinderen lazen inde sal dat
- 5,9 Leyn sin des Gestiftes van kolne ewelichen . Jnde sal man die selue Burg inde dat dar zuo gehoert inde gekoft is beueilen zuo huodene deime Edele manne herin Johan van Nuowenaren Elf iare dat dei kindere heiy entuschen zo eren dagen kuomen . inde bi geslafen
- 5,10 haynt Sowanne dat gescheit is so sal man den kinderen dat huos antworten mit alle deime dat dar zuo gehoert also id vuor genomit is . Jnde sal her Johan dei vuorsprochge- van Nuwenare- van der gulden des huses dei kost nemen zuo hodene dat huos binne- den Elf
- 5,11 iaren dat dar enbouen is dat sal man deime Greuen antworten weir t och dat dei hylich neit zuo en geinge van dode der kind'e beide of irre eyn des Got neit in wille / So mach vnser heire der Ertzebischof van kolne dei zuo der zijt is binne- eyne iare inde
- 5,12 Seis wechgen na dat eime mit vorkunde van deime Greuen van Gulege inde deime Greuen van virnenburg inde herin Roprechte sime Suone dat dei hylich si af gegangen inde hei dat huos losen muoge gekundegit wirt / Dat huos inde dat dar zuo gehoert inde
- 5,13 gekocht is . Losen vuor vunv en zwenzich hundert marc Brabanszer penni-ge of ieren wert an pagemente den grozen thurnois vuor veir pe-ninge brab\& / of vier kleyne zwartze thurnose vuor eyne- penni-c brabans / Dei penni-ghe sal man bezalen ze kolne
- 5,14 ayn alre hande argelist . weir dat och dat engeyn Ertzebischof zuo der zijt en were . So mach dat Capittel van kolne dei selue lose duon of also eyn Ertzebischof were na deime dat id ieme gekundegit wirt also vuor gesprochgen is wey des neit in
- 5,15 gescheige so sal man dat huos inde dat dar zuo gehoert inde dat der Greue gekocht hait / deime Greuen van Guleghe of sinen Eruen lenen mit ander sime Guode dat hei va- me Gestifte hait / vort me so sin wir vouerdragen of t also geueile dat her Johan

- 5,16 van Nuowenaren binne- deir zijt stuorue so sal beide der Ertzebischof inde der Greue / as si beide geschigert haint sowa-ne vore eynd den and'en aicht dage vuor maint ze kolne in riden of iegelich vuor sich zein Riddere legen of si seluer neit in mogen
- 5,17 leisten neit van danne ze kuomen bis si Ouerdragen haynt vp eyne-gemeyne- Man dei dat huos huode zuo der kind'e behoue alse dar vuor gesprochgen is / ayn argelist . vort sprechgen wir dat noch der Ertzebischof noch der Greue van der buorg zuo /
- 5,18 Rymezheym sich behelpen ein sal / id en were vorre beider wille / weir och dat we dat huos of dat Goit dat dar zuo gehoert aine verde binne- deir zijt / dat sal her Johan van Nuwenaren weiren of we dat Huos vndin hait / were dat hei des Ertzebischofs
- 5,19 inde des Greuen dar zuo behouede so suolen si dat an beiden siden weren weder iegelichen man ain argelist / were och wey dat geueile dat der Ertzebischof inde der Greue Swiende worden of weder eynd weren des neit gescheyn en muoze
- 5,20 So in sal noch dan dat huos van Rymezheym noch engeyn deil des godes dat dar zuo gehoert irre ingeyn ayn gryfen / Mer dat sal an beiden siden bevreidet stayn / also dat vorre engeyn dar ayne grife noch an huos noch an Guoit . weir och
- 5,21 dat der Greue breche den hylich dat hei sin Dochter anderswar geue of neit in gestade dat sin Dochter herin Roprechts Suon neme / so sal her Johan / of we dat huos dan Jnne hait / dat Huos deime Greuen van virnenburg inde herin
- 5,22 Roprechte sime Suone antworten mit alme dat dar zuo gehoert / Jnde solen si dat behalden alse eynd leidich huos des Gestiftes van kolne weir t och dat an herin Roprechte inde sime Suone enbrege dat si neit a- me hylich en wolden vollevarin
- 5,23 So solen si deime Greuin van Gulege geuen zwey Dusent marke pe-ninge of voren wert an pageme-te dat vuor gesprochgen is / Jnde sal dat der Greiue van virnenburg inde her Roprecht sin Suon mit Burgen versicheren deime Greuen
- 5,24 van Gulege ze geuene inwendich eyne iare na deime dat deir hylich aue geit / inde so mach der Ertzebischof dat huos losen alse van eirste wei t vuor gesprochgen is . vort meir van Broche solen wir sagen vop vnsen eyt eynd recht / weire dat
- 5,25 wir zwienden an me rechte so sal deir Hertzoge van Brabant / dar na binne-eyme iare van deime dage welig zijt hei wilt sayn eynd recht vp sinen eyt of man eyne engeynre minnen volgen in wilt . inde dat mach hei duon mit sime
- 5,26 offene breive of mit sine Munde . Van Zuolpeghe sprechgen wir dat man alle dei briue halde dei dar vp gemachtgit sint also verre alse men dei van rechte halden sal . van Lippe sprechgen wir eyndrechlige dat der Greue van Guolege
- 5,27 Luppe weder lasen sal herin wernere prinzels wan t Leyn is des Ertzenbischofs van deime zolle zuo wintere inde van deime schaden des iegelich den anderen zyet sprechgen wir / dat si des an beiden siden verzien solen inde der eynd

- 5,28 den anderen quijt lazen . van der Euene zuo Birmsich so sagen wir dat si
des Ertzenbischofs is . van der Paffene guode dei dar steruent in me Lande
van Gulege sagen wir dat der Greue des neit sich vnderwinden en sal Mer
laze eyne-
- 5,29 iegelichen paffe sin testament duon van sime guode . vort meir so sprechgen
wir dat vnse heire der Ertzebischof sin geistlich gericht inde recht also verre
als id an geistlich recht trift in der graschaf van Guleghe vord'en mach
- 5,30 inde behalden inde sal in dar ayne neit deir Greue hinderin . Jnde wat an
weriltlich gericht rorit dat sal der Greue richten . van deime guode zuo
Juchgede inde dat dar zuo gehoert want wir dei warheit an beiden siden bas
willen
- 5,31 verneme- so en sayn wir an deisen ziden neit / Mes wir behaldent zuo vnser
sagen dei da Raitlude sin . van Rodine inde van Petternich sprechgen wir
dat der Ertzebischof dei Houe losen mach van deime Greuen van Gulege
vuor dat
- 5,32 gelt dar si vuor ze pande staint / van der Buorgele sprechgen wir dat
der Ertzebischof behalden sal sin recht . deir Greue van Gulege inde
Huoltzgenose- ier recht na deime dat dei Huoltzgenosen deylent van alders
vp ieren eyt .
- 5,33 van deime Nuwen buwe de gebuwit is vp me eygene in me Hogerichte
des Ertzenbischof dat halden wir an vnsme sagen vozgenome- wichterig .
vort meir so sal noch der Greue des Bischof / noch der Bischof des Greue-
vngerechgeden
- 5,34 amtman intfayn . noch vor eynich / den weider den anderen halden . vort
me Hundert marc geldes dei der Greue vordert / want si der Ertzebischof
wicbolt geloift hadde . Jnde eyne iarguolde van korne inde van gelde dei
- 5,35 der Greue ze Lechgenich vp gehauen hadde / so sagen wir vp beiden siden
quijt / Mit deisen vuorsprochgen stucken so sal vnse heire der Ertzebischof
inde der Greue van Guleghe dei vuor genomit sin / versuont sin an allen
stucken / dei bis
- 5,36 vp deisen dach vp geloifen waren tuschen in alse vuor gesprochgen sint
/ Jnde sal vor iegelich vp den anderen verzien kleirliche ayn argelist . Jn
vorkunde deis so hayn wir vuor genuomde Suonlude vnse Jngeseigele an
deisen breif gehangen mit
- 5,37 Jngesegelen der Partien an beden siden / des Capittels van deme Duome ze
kolne / inde des hogen Edelen Manz her Johans des Hertzogen van Brabant
/ Jnde wir vuorsprochen Partien inde Capittel va- me Duome inde Johan
hertzoge van
- 5,38 Brabant in vorkunde deiser stucken hangen wir vnse Jngesegele an deisen
breif . Deise Suone is gesait ze kolne vp des Ertzenbischofs sale da
man schreif van Goitz gebuorden Dusint Dru hundred inde Seis Jar des
Dunrisdages dei was
- 5,39 sente Gylies dach des abdes
- 6,1 IN Godes namen amen . Wir Heynrich van Godes genaden der heiliger
kirgen van kolne Ertzebischof / inde des heyligen Riches van ouer berg
Ertzekanzelere .

- 6,2 inde Johan hertzoge van Lotringen van brabant inde van Lymburg . duon
kuont allen den Gienen dei duosen breif seynt inde horent dat
- 6,3 wir vmbe gemeyne beste des landes / vns mit gegevener truwen inde ganzer
Sicherheit / Samen verbunden hauen dei wile dat wir leven inde ouerdragen
- 6,4 mit rade vnser .. Maige inde vruonde dat vnser eyn deme anderme zuo sime
Reichte bihaldene bihulplich sal sin weider eynen iewelichen Man mit aller
siner
- 6,5 maicht sunder argelist vp sine kost . vsbischeiden dat Richge Jnde mallig
van vns sal des andeirs geweldig sin zuo Reichte / inde oich sinre ..
vnderdeiniger
- 6,6 Geistlig oue weretlich . Maige inde sinre Manne sal hei geweldig sin an
wein van vns dat geit suonder argelist . Jnde soweit mit Reichte ieme neit
in wuolde lassen
- 6,7 geuogen / inde sich weider vnser eyn setzen mit stoltzheide inde mit
veraele z uonreichte . Soweit van vns des anders dairf ze helpene also
hei ne bi beident
- 6,8 so sal hei ieme hendelingen ze helpe kuomen vp sine kost na aller sinre
maicht als it vuore steit geschriuen den .. Man alsuolig ze haldene dat hei
van deme
- 6,9 verauele inde vnreichte laisse inde an reichte blive . Roifeit oig ieman duo
straisse zuo waissere oue vp me Laynde der Neiste van vns sal deme ..
Royuere na
- 6,10 vuolgen mit sinre maicht inde sal den Roif bishudden / inde duon dar zuo
dat hei schuldig is na Reichte . inde dairf hei des anders van vns dar zuo
dei sal ieme zuo
- 6,11 helpen kuomen als it vuore steit geschreuen . Jnde vp dat dit
vorbuontnisse steide si inde tuoschen vns bliue vnverbruochlig so hayn
wir vnse Jngesiegele an deisen
- 6,12 breif gehangen . Dit is gescheit zuo kolne in vorkuonde der edeler manne
Gerardes des greiuen van Gulege . Euerardes des greiuen van der
- 6,13 Marken . Ruopreichtes des greuen van virneburg . inde Johanneis des
heirren van kuoc vnser maige inde manne / dei iere Jngesiegel an duosen
breif
- 6,14 hant gehangen in vorkuonde deiser dinge . Jnde wir Gerart van Gulege .
Euerart van der Marken . Ruoprecht van virneburg . Greiuen inde Johan
- 6,15 heirre van kuoc dei vuor genuomt sin iergeyn des dat duose vuorewuorde
wair sint / inde vermiddes vns gemaicht sint als it vuore steit geschreuen
- 6,16 gelouen na aller vnser maicht mit guoden truowen vnse heirren den ..
Ertzebischof van kolne . inde den Hertzogen van Braibant dei vuor genuomt
sint
- 6,17 dar ane zuo haldene dat sij duose vuorewuorde inde geLoifnisse steide inde
vast halden inde duon als it vuore steit geschreuen . Dis breif wart gegeuen
- 6,18 im me Jare Godes duo man zailte . Druozein huondert iar inde Ses iar des
neisten dages Seint Gilien daige
- 7,1 Wir Johan greiue van Spaynheym . duon kuont allen den Gienen dei desen
breif seynt inde horent lesen dat wir gelouet hayn inde

7,2 gelouen inde gesworen hayn vp ten heyligen den Lantfride den vnse heirre
 her Ludewich van Godes genaden Romeschge koninc
 7,3 zuo Bachgerachge gemachtget hait mit ten .. Fursten inde anderen ..
 Heirren inde den steiden . steide ze haldene zuo schirmene inde
 7,4 zuo vridene getrulichgen alse der Lantfridebreif de vuor genuomden ..
 konnix gelesen wart inde da ouer gemachtget is
 7,5 steit geschriuen Des zuo eyne vorkunde inde vaste steidigeit so hayn wir
 vnse Jngesigel gehangen an deisen breif De gegeuen
 7,6 is zuo Bachgerach in der Mitwechgen voir sentte Joha-nes dage des doiffers
 an me Jare Godes Dusent inde
 7,7 Dru hundert inde Seuenzeyn Jair

8,1 Wir Kracht van Griphensteyn . duon kuont allen den . Gienen dei deisen
 breif seint inde horent lesen dat wir gelouet
 8,2 han inde gelouen / inde gesworen vp ten heiligen den Lanfride den vnse
 heirre her Luodewich van Godes genaden
 8,3 Romesger kuonic zuo bachgerachge gemachtget hait mit ten .. Fursten inde
 and'en .. Heirren inde den ..
 8,4 Steden . steide zuo haldene zuo schirmene zuo vriedene getrulichge als der
 Lantfridebreif des vuor genuomdes ..
 8,5 Koninx gelesen wart zuo sentte Marien zuo den Greiden binnen kolne inde
 da ouer gemachtget
 8,6 is steit geschreiuu Des zuo eyne vorkunde inde vaste steidigeit so hayn
 wir vnse Jngesigel gehangen an
 8,7 desen breif . dei gegeuen is zuo kolne vp sentte Peters in Paules auent der
 apostelen . an me Jare Godes . Dusint
 8,8 Dru hundert inde Seuenzeyn iair

9,1 Wir Wilhelm eirste Sun vnser Lieven heirren heren Gerardes des Greven
 van Gulege duon kuont allen den Gienen dei deisen
 9,2 breif seint inde horent lesen dat wir gelouet han inde gelouen inde gesworen
 hain vp ten heyligen den Lantfride den vnse /
 9,3 heirre her Ludewich van Godes genaden Romesche kuoninc zuo
 Bachgerachge gemachtget hait mit ten .. Fursten inde and'en
 9,4 Heirren inde den steiden / stiede zuo haldene zuo schirmene inde zuo
 vriedene getruligen als der Lantfridebreif des
 9,5 vuor genuomdes kuoninx gelesen wart zuo sentte Marien zuo den Grieden
 binnen kolne inde da ouer gemachtget is steit geschriuen
 9,6 Des zuo eyne vorkunde inde vaste steidigeit so hayn wir vnse Jngesigel
 gehangen an deisen breif . dei gegeuen is zuo
 9,7 kolne vp sentte Peters inde Paules auent der apostelen an me Jare Godes
 Dusent Dru hundert inde Seuenzeyn Jair

10,1 Wir Wilhelm greue van Arnesberg duon kuont allen den gienen dei deisen
 breif seint inde horent lesen / dat wir gelouet hayn
 10,2 inde gelouen / inde gesworen hayn vp ten heiligen / den Lantfride / den
 vnse heirre her Luodewich van Godes genaden /

- 10,3 Romesch koninc zuo Bachgerachge gemachtgit hait mit den .. Fursten /
inde anderen heirren / inde den and'en steden /
- 10,4 steide zuo haldene / zuo schirmene inde zuo vriedene getruuligen alse der
Laintfriedebreif des vuor genuomden ..
- 10,5 koninx gelesen wart zuo sente Marien zuo Greden binnen kolne inde da
ouer gemachtget is steit geschreiven .
- 10,6 Des zuo eyne vrkunde inde vaste steidigeit so hayn wir vnse Jngesiegel
gehangen an diesen breif .. Dei gegeuen
- 10,7 is zuo kolne vp sente Peiters inde Paules auent der apostelen . an me Jaire
Godes . Dusent dru hu-dert
- 10,8 inde Sevenzeyn Jaer
- 11,1 Wir Ailf greue van deime Berge . duon kuont allen den geinen die deisen
breyf seynt inde horent
- 11,2 Leysen dat wir gelyoft hayn inde geloven inde mit gegevenre truowen
gesiggert hayn an eydis
- 11,3 stat . den Lantvriede den vnse Heirre her Lodewich van godes genaden
Roymische koninc zuo Bachgerag
- 11,4 gemagt hait mit den .. Vuorsten inde anderen .. Heirren inde den .. Steyden
. steide zuo haldene
- 11,5 zuo schirmene inde zuo vriedene getruowelighen . als der Lantvriedebreyf
des vuor genoynden ..
- 11,6 koninx geleysen wart zuo sentte Marien zuo greiden binnen kolne inde da
over gemagt is steit
- 11,7 geschreiven . Jnde des zuo eyne vrkunde inde vaste stedegeit / so hayn wir
vnse Jngesegel gehangen an
- 11,8 diesen breif . Dei gegeiven is zuo kolne vp sentte Peters inde Pauwils Dage
der apostele an me
- 11,9 Jaire Godes Duosent Druo Huondert inde Seuenzeyn Jair
- 12,1 Wir .. Richter .. Buorgemeistere .. Scheiffene .. Rait inde gemeyne .
Buorgere Van Dusebuorg . duon kuont allen den Geinen dei deisen breif
seynt
- 12,2 inde Horent lesen dat wir geloueit hayn inde gelouen inde gesworen hayn
vp den heylichen / den Lantfriede den vnse heirre her Luodewich van godes
genaden Ruomesche kuoninc zuo Bachgerach gemachtget hait mit ten ..
- 12,3 Vuorsten inde anderen .. Heirren inde mit ten .. Steiden . steide ze haldene
.
- 12,4 zuo schirmene inde zuo vriedene getrulichgen als der Lantfriedebreif des
vuor genuoymden .. Kuoninx gelesen wart zuo sentte Marien zuo
- 12,5 Greiden binnen kolne inde dar ouer gemachtget is steit geschrieuen . Des
zuo eyne vrkunde inde vaste steidigeit so hayn wir vnser
- 12,6 stede gemeyne ingesigel an deisen breif duon hangen . Dit is gescheit des
neisten dages sentte Peters inde sentte Paules dage der apostelen
- 12,7 in me Jaire vnser Heirren Dusent . dru hundert inde Sevenzeyn Jair
- 13,1 Wir Rabode der Scheyle van Odenkirgen ridder Jnde Rabode sin Suon duon
kunt allen den genen de deisen breif ane seynt Jnde Huorent leisen

- 13,2 want wir vuor vns inde vnse wislige Eruin verkoigt haen den Eirsuomen
personen herin Johanne van me horne de genant is van Gurtzenich
13,3 Scheffene zuo kolne Jnde vern Florettin sime Elichme wyue inde erin
wisligen Eruin / eynne Jnde Nunzig Morgen vrieysgens arclans de zeynde
13,4 geldent also si geleygen sint in me velde ze Boystorp Jnde in me velde ze
vlisteden . Jnde oyg vnsen hof zuo Boystorp mit der hoifstat Sowe he
13,5 gelegen is mit zwen husen inde erin hoifsteden de geldent alre jairlinchs
Eygt schillinge pe-ninge Jnde veir in zwenzig Hoenre erfligs zuns
13,6 Jnde eygzeyn morgen vrieysgens Buosch de gelegen sint in der velen bi
Oysheym / also as der groische breif de dar vp gemacht is Jnde beseigelt
13,7 behelt volkuomenklig / So gelouen wir in guoden truwen de wir gesichert
haen den vuorsprochin hern Johanne van me horne inde vern
13,8 Floretten sime wiue inde erin wisligen Eruin alre hande krut Jnde reigte
anesproche bunne Jare inde dage ane ze duone van deme guode erue
13,9 Jnde rente de vuor genant sint Jnde gelouen si vort dis goitz Jnde Erues ze
werin as t eyn reigt is Jnde gewoenligen ouen Jnde Neder z allen ziden
13,10 vrieysgens Goitz ze werin mit vnser kost inde arbeit . Jnde haen des in zuo
meirre stedegheit deser vuorworden ze burgen gesat mit vns
13,11 beydesamen alse sagwalde Jnde Buorgin benamen ze buorge Henriche van
Polle Henrich van Gronouwe den amtman van Beidbuore Systappe
13,12 van glessen Ruobode van vlisteden Johanne van Reyde wernere koytze van
vlisteden wernere Schutzendorp Jnde Reynarde Rutgeirs
13,13 Suon van vlisteden de sich vuor vns Jnde mut vns vuor dese vuorsprochen
vuorworde stede ze halden Jnde zuo ze brengin mallich vuor al verbu-den
13,14 haent Jnde gelayft in guoden truwen / weir t dat sachge oue wir an eynnege
deser vuorworde versumich weren Jnde oyg dei vuorsprochin
13,15 herin Johanne inde vern Florettin sin wyf oue ere Eruin dis Goitz Jnde Erfs
neit in werdin nog reichte anesproche in neit aue Jn
13,16 dedin dat dan wir beide samen Jnde vnse Burgen as balde wir inde si
gemaent werden van erin wegen solen alle samen ze kolne Jn
13,17 kuomen in eynne Eirsome Herberge de si vns bewisen oue wir Jnde mallich
vnser burgen eyn mach vuor sich leigen eynne- walegeboren
13,18 kneigt mit eynme perde vp vnse kost alle dage ze essin Jnde ze leistin as
guode buorgen vs der lestungen nu-mer me ze kuomen nog vp ze
13,19 huoren den vuor genanten herin Johanne Jnde vern Florettin sime wiue
inde erin Eruin sowes in brug is in si in e lenkligen genoig gescheit
13,20 mit vnser kost inde arbeit Jnde is dat sachge dat deser Burgen eynnich
afluich wirt so solen wir in / bunnan veir wegen dar na eynnen
13,21 anderin guoden Buorgen in sine stat weder in setzen Jn dede wir des neit
so solen wir inde andere vnse Buorge dei leuendich sint alse
13,22 balde wir dar vp genaent werden semencligen in kolne varen ze leisten as t
vuor steit geschreuen bis dat wir herin Johanne Jnde Florettin
13,23 inde erin Eruin eynnen anderin Burgen in des stat de doit is weder haen
gesat / alre hande argelist vsbescheyden Jn desen vuorworden
13,24 Dis zuo eynme vorkunde Jnde stedegheit so haen wir gebeiden mit vnsen
Burgen herin Wilhelm schormsteyn den kirgheirrin van Boystorp
13,25 dat he sin Jngeseigel mit mime Jngeseigele herin Raboden des ridders an
dusen breif hait gehangin . Dit is gescheit des neisten Sundais

- 13,26 na sente Pauwils dage dat hei bekeirt wart Jn me Jare Goitz Dusent Dru
hundert Jnde zwenzig Jair
- 14,1 Wir Rabode der Scheyle van Odenkirgen ridder Jnde Rabode sin Suon duon
kunt allen den geinen de dusen breif
- 14,2 ane seynt inde huorent leisen want wir vuor vns inde vuor vnse wislige Eruin
verkoygt haen den Eirsomen
- 14,3 personen herin Johanne van me horne dei genant is van Guortzenich
Scheffene ze kolne Jnde vern Florettin sinre
- 14,4 eliger Huosvrouwin Jnde erin wisligen Eruin vnse- hof ze Boystorp vnse
Erue / goit Jnde oyg vnse Rente
- 14,5 sowe da Jnde vp me velde ze Boystorp Jnde oyg in vltzsteder velde Jnde
dar zuo zeyn morgen buosch vrieys /
- 14,6 geleigen sint alse de groisze breive de dar vp gemacht inde beseigelt sint
volkomenkligen behaldent
- 14,7 dat wir dog willen huoden krut inde aensproche Rabodin inde Gerartz de
sone sint agnesin vnser snurgin
- 14,8 inde Swegerin Jnde de vnse Eynkelin inde Neuen sint / dei nog bunne- erin
dagen sint / aigter maelz vp dit Goit
- 14,9 inde Erue duon moigten / oyg wei si eyngelynre hande reigt hei ane neit in
hauent nog in haen as t deme Rigter
- 14,10 Jn den Lantmannen wale kundig is . dog so gelouen wir in guoden truwen
of dei vuorsprochin Rabode Jnde Gerart
- 14,11 zuo eren dagen quemen Jnde dit selue goit inde Erue sowe t geleigen is ane
spregen Jnde kroyden dat
- 14,12 wir dan de anesproche Jnde krut den vuor genanten herin Johanne Jnde
vern Florettin sime wyue Jnde erin
- 14,13 wisligen Eruin ane solen duon mut vnser kost inde arbeit Jnde haen zuo
meirre stedegheit ze burge Jnde ze sachwalde
- 14,14 gesat Henriche van polle Rabode van vltzsteden Gerarde sinen Broder Jnde
wernere Schutzendorp
- 14,15 van vltzsteden de sich vuor vns inde mut vns vuor de vuorsprochin
vuorworde ze volvoren mallich vuor al verbu-den
- 14,16 haent inde geloyft in guoden truwen . mit aldus gedaenre vuorworde oue
wir Jnde vnse Burgen vp eynne
- 14,17 brug deser stücke gemaent werden van herin Johans inde vern Florettin
Jnde eirre wisliger Eruin weigen
- 14,18 dat wir Jnde vnse Buorgen dan semenkligen ze kolne in varin solen in eynne
Eirsome Herberge dei si vns Jn
- 14,19 kolne bewisen of mallich van vns oue van vnsin Buorgen mach dar vuor sich
leigen eynne- eirsomen knappe mut
- 14,20 eynme perde vp vnse kost alle dage ze essin Jnde ze Leistin as guode Burgin
vs der leistung nu-mer me ze
- 14,21 varin nog ze kuomene den vuor genanten herin Johanne inde vern Florettin
sime wiue Jnde erin wisligen
- 14,22 Eruin Jn si zuo eirst alle krut Jnde aensproche Rabodes inde Gerartz der
kundere vp dat vuor genante

- 14,23 Goit inde Erue aue gedaen mit vnser kost inde arbeit . vort were dat sachge
oue eynnich vnser Buorgen
- 14,24 dei vuor genant sint affliuch wuorde so solen wir bunnen veir wegen in
eynnen anderin guoden Buorgen weder
- 14,25 setzen in des stat de doit is Jn dede wir des neit alse balde as wir Jnde andere
vnse Burge dar vp gemaent
- 14,26 werden solen semenkligen inde hendeligen ze kolne in varin ze essin Jnde
ze leistin in alle der wis as t vuor gesprochin
- 14,27 is as lange bis dat wir herin Johanne inde vern Florettin sime wiue Jnde erin
wisligen Eruin eynne-
- 14,28 anderin guoden Burgin Jn des stat de gestoruin is weder haen gesat alre
hande argelist vschbescheiden in duosen
- 14,29 vuorworden . Dis zuo eynme vorkunde Jnde zuo eynre meirre stedegeit so
haen wir gebeiden herin wilhelm Schormsteyn
- 14,30 den kirgheirren van Boystorp dat hei sin Jngeseigel mut mime Jngeseigele
herin Rabodin des ridders
- 14,31 van Odenkirgen an dusen breif gehangen . vnder deisen Jngeseigele dat ig
Rabode sin suon Jnde wir andere
- 14,32 Buorgen dei vuor genant sin verbunden vnsalle de vuor geschreuen
vuorworde stede ze halden aen argelist . Dit is
- 14,33 gescheit des neisten Suondais na sente Pauwils dag dat hei bekirt wart an
me Jare Goitz Dusent Dru hundert
- 14,34 Jnde zwenzig Jair
-
- 15,1 IN Godes namen amen . Wir Rabode der Scheyle van Odenkirgen Ridder
Jnde Rabode sin Suon duon kunt allen den genen de dusen breyf seynt Jnde
horent
- 15,2 leisen dat wir vuor vns inde vnse wislige Eruin Jnde mut guoden willen
Jnde gehencnisse vnser doygtere inde Sustere Alekin inde Cecilien Jnde
oyg vnser
- 15,3 Snurgin inde Swegerin agnesin Rabode inde Gerartz eirre kundere Jnde oyg
mit vuorrade wust inde gehencnisse der kundere gemeyne neiste Mage
- 15,4 van Ewer siden der Leinen benamen Rutgers van Gartzwilre Henrichs van
Polle inde andere der kuondere neiste mage den bas doigte dis koif Jn
- 15,5 der kundere vrbuore sin gedaen dan gelaischen mit gesamender Hant
verkoygt haen inde verkoyfin vorkunde dis breifs den Eirsomen personen
herin
- 15,6 Johanne van me Horne de genant is van Guortzenich Scheffen ze kolne Jnde
ver Florettin sinre eliger Huosvrouwin Jnde erin wisligen Eruin de weder
- 15,7 vns gerechligen Jnde redeligen geguldin haent Eweligen inde Erfligen dat
Goit Jnde dat Erue dat na steit geschreuin benamen eynne inde Nuonzich
morgin
- 15,8 vrieeygens arclanz de zeynde geldent de geleigen sint Jn me velde in me
gerichte ze Boystorp Jnde oyg in vlisteder velde an den steden de na steynt
geschreuen
- 15,9 benamen zeyndehalf morgen de geleigen sint an der stat Jn me
Grinmenrode / Euer Eygt morgin de geleigen sint vp der voyskulen . Euer
zwene morgin

- 15,10 de geleigen sint vp der kummin . Euer Eylfttehalf morgen de Scheissint vp
den Beynt /. Euer veirdehalf morgen de geleigen sint vp me Beynde . Euer
15,11 eynnen morgen de deise veirdehalf morgin Roirt . Euer Seuen morgen de
legent aichter Arnolts Houe des Rodin Euer veirdehalf morgin in vlisteder
15,12 velde Euer dri morgen da bi geleigen sint / Euer Eylf morgen geleigen sint
in vlisteder velde zuo me Hoeme Rade wert / Euer Nuon morgen in deime
15,13 seluen velde vp der Hoe Euer Eylf morgen de geleigen sint vp me Rode bi
deme groischme ackere de gehoirt in den vroenhof ze Boistorp . Euer
15,14 Nun Morgin de geleigen sint vp der Roysinarin . Euer dri morgen de
geleigen sint vp me Lutzin arde . Euer vnsen Hof inde de Hoifstat ze
Boystorp
15,15 dei vrieygen is inde zeynde vri vuor inde aigthen vnden inde Ouen mit alle
sime beheltnisse dat dar zuo gehuoyrt sowe de hof geleigen is in alle deime
15,16 Reigthe also wir in her braigt haen inde besessin / mit zwen husen Jnde ere
Hoyfsteden dei geldent alre Jairlinchs Eygt Schillinge penninge Jnde veirre
15,17 Jnde zwenzig Hoynre Erfligs zuns . Jnde oyg zeyn morgen vrieygens Buosch
in der velen geleigen sint bi Oysheym . Dit vuor genante Goit erue
15,18 Jnde Rente sowe si geleigen sint solen de vuor genante her Johan van me
Horne Jnde ver Florette sin wyf Jnde ere wislige Eruin besitzen halden Jnde
15,19 hauen eweligen Jnde Erfligen vmbe eynne summe pe-ninghe de si vns in
vnse kenlig vorbuore inde Nuotz gegeuen haent gezalt Jnde wale bezailt
zuo
15,20 alle vnsen willen / Her vmbe dat wir quamen mit vnsen doygterin inde
Susterin Alekin Jnde Cecilien Jnde oyg mit agnesin Rabode inde Gerarde
15,21 eirre kundere vuor Heynriche van Gronouwe den Richter Jnde vuor dei
gemeyne Lantlude zuo Boystorp vuor de kyrge vp de vrie straisze Jnde
15,22 droegin vp Jnde haen vp gedraen los inde ledich den vuorsprochin Johanne
van me horne Jnde vern Florettin sime wyue Jnde erin wisligen Eruin
15,23 dat vuor genoemde Goit Erue Jnde Rente sowe si geleigen sint zuo erin
hendin as vuor eyn vrieygin Goit Jnde sin des vs gegangen in alle deme
15,24 Reigthe as t gewoenligen is ouen Jnde Neider vrieygens Goitz vs ze gane
Jnde ze werrin Jnde haen wir oyg da in bouen mit vnsen doygterin Jnde
15,25 Susterin Alekin Jnde Cecilien Jnde oyg mit Agnesin Rabode inde Gerarde
erin kunderin de vuor genant sint in vorkunde des Rigters Jnde der
Lantlude
15,26 zuo Boystorp dei vuor sprochin sint vp dat vuorsprochin Goit Erue Jnde
Rente sowe si geleigen sint verzegen Jnde verzien Jnde haen oyg
15,27 Jnweg geschoffin mit munde mit hendin Jnde mit halme as t gewoenligen
Jnde reigt is zuo hendin der vuor ganter herin Johans van me Horne Jnde
vern
15,28 Florettin sime wyue Jnde erin wisligen Eruin / also dat si dit selue Goit
Erue Jnde Rente sowe si geleigen sint mit erflichme Reigte besitzen Jnde
15,29 behalden solen . Jnde hait oyg Henrich van Gronouwe der vuorsprochin
Richter van Boystorp ban Jnde vrede vermytz ouer den Lantman gedaen vp
15,30 dat Goyt Erue Jnde Rente de vuor genant sint / Jnde verzien oyg vuor vns
Jnde vuor vnse Eruen alre hande werwort Jnde weringen geistligs
15,31 Reigts Jnde werenkligs argelist Schalcheyt Jnde quader behendegheit de
vns aigt' maeltz ze staden moigten staen vp dat Goit Erue Jnde Rente dei

- 15,32 vuor genant sint Dis zuo eynme vorkunde Jnde zuo eynre Eweliger
stedegheit so haen wir gebeiden den Edelin man Heynriche van
Ryfferscheit den
- 15,33 Heirrin van Bedebuore Jnde oyg de vroeme Eirsome Lude herin Gerarde
den Burgreuen van Odenkirgen Jnde herin Raboden van Rode riddere
- 15,34 dat si ere Jngeseigele mit mime Jngeseigele herrin Rabodes van Odenkirgen
vuor genant is an dusen breif haent gehangen / vnder deisen Jngeseigelen
- 15,35 vorbundin ig Rabode herin Raboden suon van Odenkirgen mich alle dese
voorworde stede ze halten . Dit is gescheit in vorkuonde Heynrichs des
Richters
- 15,36 Thilmans koyue Erwins des wirtz Gobels thonys . Gerartz spangenslegers
Jnde andere vele Lantmanne van Boystorp Jn me Jare Goitz Dusent
- 15,37 Dru hundred Jnde zwenzig Jare des neisten sundais na sente Pauwils dag
dat hei bekeirt wart